

EKSKURZIJA U ŠPANIJU

U organizaciji Udruženja građana "Geodet" organizovana je ekskurzija u Španiju preko turističke agencije "Alfas". Dana 21.09.2001. godine u jutarnjim satima ispred Geodetske uprave u Tuzli krenuli smo prema Gradačcu gdje nam se pridružilo još 13 naših članova.



Put smo nastavili preko Zagreba, Ljubljane, pa sve do Verone vječitog grada ljubavi gdje smo imali i razgledanje grada: Trg Bra, Arenu, Trg Erbe, Julijaninu kuću i dr. U italijanskom gradiću Garda smo prespavali prvu noć. Poslije doručka nastavili smo putovanje Azurna obala – Lloret de Mar. Smješteni smo u neadekvatan hotel, pa je na insistiranje svih putnika u jutarnjim satima promijenjen hotel. U Lloret de Maru smo posjetili zabavni park "Marineland" (dresura delfina, foka, papagaja te mnoge vodene atrakcije: akvagani, vodeni tobogani, planinske rijeke, bazene i drugo.), viteške igre, Flamenco poznati španski ples i razgledali grad i plaže.

Dva puta smo išli u posjetu u Barcelonu, jedan od najvećih gradova Catalonije. U Barceloni smo posjetili Sagrada Familiu, Aveniju Diagonale, Nou Camp, stadion fudbalskog kluba Barcelona, Kolumbov spomenik, Placa Cataloniu kao i Olimpijski stadion gdje je 1992. godine održana Olimpijada.

Poslije pet dana u Lloret de Maru krenuli smo prema francuskom gradu Cannesu gdje smo pored razgledanja grada vidjeli filmsku palatu u kojoj se dodjeljuje poznata filmska nagrada "Zlatna palma". Poslije smještaja u hotelu u Cannesu i manjeg odmora krenuli smo ka francuskom gradu Nica. Onda smo krenuli u Kneževinu Monaco gdje smo stigli u večernjim satima. Pored razgledanja Kneževine posjetili smo kockarnicu u Monte Karlu gdje smo probali i našu kockarsku sreću, poslije čega smo otišli na spavanje.

Sutradan, poslije doručka smo krenuli u pravcu Venecije. U Veneciji smo posjetili Trg San Marco, Rialto most, Most uzdisaja, Basilicu San Marco i dr. Sa prvim mrakom vaporetom smo krenuli u Tronket gdje nas je čekao autobus, odakle smo krenuli u pravcu Bosne i u Tuzlu došli 29.09.2001. godine u jutarnjim satima.

Put je trajao punih osam dana, prešli smo oko 4000 km, prošli smo šest evropskih država i Kneževinu Monaco i mnogo gradova i sretni se vratili svojim kućama.

Pastuhović Andrija